

ԼԵՌՆԱՅԻՆ ՂԱՐԱԲԱՂԻ ՀԱՆՐԱՊԵՏՈՒԹՅԱՆ ԿԱՌԱՎԱՐՈՒԹՅՈՒՆ

Ո Ր Ո Շ ՈՒ Մ

11 մարտի 2014 թ.

N 139-Ա

ք. Ստեփանակերտ

ԼԵՌՆԱՅԻՆ ՂԱՐԱԲԱՂԻ ՀԱՆՐԱՊԵՏՈՒԹՅԱՆ ԲՆՈՒԹՅԱՆ
ՀՈՒՇԱՐՁԱՆՆԵՐԻ ԱՆՁՆԱԳՐԵՐԻ ԿԱԶՄՄԱՆ ՄԻՋՈՑԱՌՈՒՄՆԵՐԻ
2014 ԹՎԱԿԱՆԻ ԾՐԱԳԻՐԸ ՀԱՍՏԱՏԵԼՈՒ ՄԱՍԻՆ

Լեռնային Ղարաբաղի Հանրապետության կառավարության 2014 թվականի հունվարի 14-ի «Լեռնային Ղարաբաղի Հանրապետության 2014 թվականի պետական բյուջեի կատարումն ապահովող միջոցառումների մասին» N 1-Ն որոշման 17-րդ կետին համապատասխան՝ Լեռնային Ղարաբաղի Հանրապետության կառավարությունը **որոշում է**.

Հաստատել Լեռնային Ղարաբաղի Հանրապետության բնության հուշարձանների անձնագրերի կազմման միջոցառումների 2014 թվականի ծրագիրը՝ համաձայն հավելվածի:

ԼԵՌՆԱՅԻՆ ՂԱՐԱԲԱՂԻ
ՀԱՆՐԱՊԵՏՈՒԹՅԱՆ ՎԱՐՉԱՊԵՏ

Ա. ՀԱՐՈՒԹՅՈՒՆՅԱՆ

ԾՐԱԳԻՐ

ԼԵՌՆԱՅԻՆ ՂԱՐԱԲԱՂԻ ՀԱՆՐԱՊԵՏՈՒԹՅԱՆ ԲՆՈՒԹՅԱՆ ՀՈՒՇԱՐՁԱՆՆԵՐԻ ԱՆՁՆԱԳՐԵՐԻ ԿԱԶՄՄԱՆ ՄԻՋՈՑԱՌՈՒՄՆԵՐԻ 2014 ԹՎԱԿԱՆԻ

1. ԸՆԴՀԱՆՈՒՐ ԴՐՈՒՅԹՆԵՐ

1. Բնության հուշարձանների պահպանությունը բացառիկ կարևորության բնապահպանական, սոցիալ-տնտեսական և ռեկրեացիոն հիմնախնդիր է, որի լուծման համար անհրաժեշտ է ձեռնամուխ լինել դրանց տարածքների հստակեցման, չափագրման, սահմանների ճշգրտման, անձնագրավորման և արդյունավետ բնօգտագործման ծրագրերի իրականացման միջոցառումներին: Լեռնային Ղարաբաղի Հանրապետության բնության հուշարձանների անձնագրերի կազմման ծրագրի իրականացումը հնարավորություն կընձեռնի գնահատել, վերահսկել բնության հուշարձանների վրա մարդածին ճնշումները, մշակել հուշարձանների բնապահպանական, գեղագիտական, ռեկրեացիոն և պատմամշակութային արժեքների օգտագործման հիմունքները: Այն հնարավորություն կտա ամփոփել բնության հուշարձանների վերաբերյալ գոյություն ունեցող տեղեկատվությունը, մշակել և իրականացնել համապատասխան քաղաքականություն, բնապահպանական, բնօգտագործման տարբեր ծրագրեր և միջոցառումներ: Բնության հուշարձանների պահպանման գոտիների հստակեցման և չափագրման, պահպանության ռեժիմների սահմանման հետագա աշխատանքների արդյունքում կամբողջականացվեն Լեռնային Ղարաբաղի Հանրապետության բնության հատուկ պահպանվող տարածքները:

2. Բնության հուշարձանների անձնագրերի կազմումը իրականացվելու է Լեռնային Ղարաբաղի Հանրապետության կառավարության 2011 թվականի դեկտեմբերի 30-ի «Բնության հուշարձանների ցանկը հաստատելու մասին» N 1053-Ն որոշմամբ հաստատված ցանկի համաձայն: Ցանկում ընդգրկված բնության հուշարձանների ընդհանուր քանակից 2014 թվականին նախատեսվում է դաշտային հետազոտությունների իրականացմամբ կազմել յոթ անձնագիր, որոնց անվանումներն արտահայտված են ստորև ներկայացված աղյուսակում.

Հ/Հ	Անվանումը	Տեղադիրքը
1	«Փանջակ քար» (Դեդ-Նատարին ամրոց) ժայռագագաթ	Մարտակերտի շրջան, Գառնաքար գյուղից 6.5 կմ հարավ-արևմուտք
2	«Կաչաղակաբերդ» ժայռագագաթ	Մարտակերտի շրջան, Քոլատակ գյուղից 3.5 կմ հարավ-արևելք
3	«Մեծ Ալ» լիճ	Շահումյանի շրջան, «Ջերմաջուր» նախկին առողջարանից 24 կմ հյուսիս-արևմուտք
4	«Վերին ջերմաջուր» հանքային աղբյուր	Շահումյանի շրջան («Ջերմաջուր» նախկին առողջարանի մոտ)
5	«Շահբուլաղ» աղբյուր	Ասկերանի շրջան, «Տիգրանակերտ» պատմական տեղավայրի մոտ
6	«Սոսի արևելյան» ծառ	Հաղբուրթի շրջան, Տյաք գյուղի մոտ
7	«Թաղարնի» (Ձեկվա) տասնյակով	Մարտունու շրջան, Գիշի գյուղում

3. Բնության հուշարձանի անձնագիրն ընդգրկելու է՝

- 1) անվանումը և դասակարգումը.
- 2) տեղադիրքը և աշխարհագրական կոորդինատները.
- 3) նկարագրությունը, չափագրությունը և վիճակը.
- 4) սահմանների և պահպանման գոտու նկարագրությունը, մակերեսը, քարտեզ-հատակագիծը.
- 5) տվյալներ սեփականատիրոջ և հողօգտագործողի մասին.
- 6) պահպանության և օգտագործման ռեժիմի առանձնահատկությունները.
- 7) տվյալներ պահպանությունն իրականացնող սուբյեկտի մասին:

4. Բնության հուշարձանների անձնագրերի կազմման համար վերը թվարկված աշխատանքների կատարումը պահանջում է համապատասխան մասնագիտական մոտեցում մասնագետների և մասնագիտացված կազմակերպությունների ներգրավմամբ:

II. ԲՆՈՒԹՅԱՆ ՀՈՒՇԱՐՁԱՆՆԵՐԻ ԱՆՁՆԱԳՐԵՐԻ ԿԱԶՄՄԱՆ ՄԻՋՈՑԱՌՈՒՄՆԵՐԻ ՆՊԱՏԱԿԸ ԵՎ ԽՆԴԻՐՆԵՐԸ

1. Լեռնային Ղարաբաղի Հանրապետության բնության հուշարձանների անձնագրերի կազմման 2014 թվականի միջոցառումների ծրագիրը (այսուհետ՝ Ծրագիր) նպատակաուղղված է դաշտային չափագրման և հետազոտման տվյալների հիման վրա հստակեցնել և չափագրել վերոնշյալ աղյուսակում առկա հուշարձանների տարածքները, որոշել և քարտեզագրել բնության հուշարձանների պահպանման գոտիները, ճշգրտել բնության հուշարձանների տեղադիրքերը, ստեղծել բնության հուշարձանների տվյալների երկրատեղեկատվական բազա, կազմել բնության հուշարձանների անձնագրերի նախագծերը և դրանց հաստատման վերաբերյալ

Լեռնային Ղարաբաղի Հանրապետության կառավարությանն առընթեր շրջակա միջավայրի և բնական ռեսուրսների վարչության պետի հրամանի նախագիծը:

2. Ծրագրի հիմնական խնդիրն է հանդիսանում Լեռնային Ղարաբաղի Հանրապետության բնության եզակի հուշարձանների պահպանության նախադրյալների ապահովումը:

III. ԾՐԱԳՐԱՅԻՆ ՄԻՋՈՑԱՌՈՒՄՆԵՐԻ ՀԱՄԱԿԱՐԳԸ

1. Ծրագրով սահմանվում են 2014 թվականին իրականացվելիք հետևյալ միջոցառումները՝

- 1) բնության հուշարձանների զբաղեցրած տարածքների հստակեցում և չափագրում.
- 2) բնության հուշարձանների պահպանական գոտու սահմանում և քարտեզագրում.
- 3) բնության հուշարձանների անձնագրերի մշակում և կազմում.
- 4) բնության հուշարձանների տվյալների թվայնացում և երկրատեղեկատվական բազայի ստեղծում:

IV. ԾՐԱԳՐԱՅԻՆ ՄԻՋՈՑԱՌՈՒՄՆԵՐԻ ԻՐԱԿԱՆԱՑՈՒՄԻՑ ԱԿՆԿԱԼՎՈՂ ԱՐԴՅՈՒՆՔՆԵՐԸ

1. Ծրագրի իրականացման շրջանակներում ակնկալվում է Լեռնային Ղարաբաղի Հանրապետությունում ունենալ՝

- 1) Լեռնային Ղարաբաղի Հանրապետության բնության հուշարձանների չափերը, քարտեզ-հատակագծերը և հուշարձանների ու դրանց պահպանման գոտու սահմանների նկարագիրը.
- 2) Լեռնային Ղարաբաղի Հանրապետության բնության հուշարձանների մշակված անձնագրերը.
- 3) Լեռնային Ղարաբաղի Հանրապետության բնության հուշարձանների երկրատեղեկատվական բազան:

V. ԾՐԱԳՐԻ ՖԻՆԱՆՍԱԿԱՆ ԱՊԱՀՈՎՈՒՄԸ

Ծրագրի ֆինանսավորման համար Լեռնային Ղարաբաղի Հանրապետության 2014 թվականի պետական բյուջեից կհատկացվի 2 000 000 (երկու միլիոն) դրամ:

**ԼԵՌՆԱՅԻՆ ՂԱՐԱԲԱՂԻ ՀԱՆՐԱՊԵՏՈՒԹՅԱՆ
ԿԱՌԱՎԱՐՈՒԹՅԱՆ ԱՇԽԱՏԱԿԱԶՄԻ ՂԵԿԱՎԱՐ**

Լ.ԳՐԻԳՈՐՅԱՆ